

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

- डोडा जिले च होए दे इक टाकरे च सेना दे इक अफसर सनें 5एं सुरक्षाकमी घायल होई गे न।
- विदेश मंत्री डॉ. एस. जयशंकर होरें आतंकवाद दी साजश रचने आले ते उंदे प्रायोजकें दी पंछान करने ते उंदे खलाफ कारवाई पर जोर पाया।
- श्री अमरनाथ जी दी यात्रा लेई जम्मू दे आधार शिविर थमां 4 ज्हार 132 श्रद्धालुएं दा इक होर जत्था घाटी लेई रवाना।
- न्यूजीलैंड च कॉमन वैल्थ जनियर कैडेट फैंसिंग प्रतियोगिता च जम्मू कश्मीर दी छवी शर्मा नै कैह दा तगमा हासल कीता।

<><><><><><>

Doda Encounter

आकाशवाणी जम्मू संवाददाता दी रिपोर्ट मूजब इलाके च आतंकवादिएं दी मजूदगी बारे थहोई दी इक टकोहदी सूह पर कारवाई करदे होई राष्ट्रीय राईफल्स, जम्मू कश्मीर पुलस दे एसओजी आस्सेआ डोडा जिले दे देसा घाटी गोट जंगलें च घेराबंदी करियै तपाशी अणियान चलाया गेआ। रातीं 10 बजे कन्नै उत्थें मजूद आतंकवादिएं सुरक्षाबलें पर गोलियां चलाना शुरू करी दित्ती। तकरीबन 20 मिंटे तगर भारी गोलीबारी होई। इस गोलीबारी च सेना दे इक अफसर सनें 4 सेना कर्मी ते इक पुलस कर्मी घायल होआ। घायलें गी अस्पताल पजाया गेआ जित्थें उंदी हालत गंभीर बनी दी ऐ। होरने सुरक्षाबलें गी मौके आली थाहर भेजेआ गेआ। खीरी खबरां थहोने तगर अभियान जारी हा। होर ब्यौरे गी अजें बलगेआ जा'रदा ऐ। पिछले तकरीबन इक म्हीने च डोडा जिले च होए दे 4 टाकरे च त्रै पाकिस्तानी आतंकवादिएं दा सफाया कीता गेआ। इनें टाकरे च 7 सुरक्षार्मी घायल होए हे।

<><><><><><>

EAM

पाकिस्तान पर अप्रतक्ख तौर पर हमला करदे होई विदेश मंत्री डॉ. एस.जयशंकर होरें आखेआ जे आतंकवाद खित्ते ते वैश्विक शांति लेई इक चुनौती बनी गेआ ऐ। इसदे समर्थकें, सहायकें, माली इमदाद उपलब्ध करोआने आले ते प्रायोजकें दी पंछान करने ते उनेंगी सजा देने दी बड़ी मती लोड़ ऐ। अस्ताना अधारित खबर अजेंसी गी दित्ते गेदे इंटरव्यू च मंत्री होरें अलगाववाद ते अत्तवाद खलाफ लड़ाई पर जोर पाया ते गलाया जे एह शंघाई सैहयोग संगठन दी प्राथमिकता ऐ। विदेश मंत्री होरें आखेआ जे एहदे च कोई शक-शूबा नेई ऐ जे दुनिया भरै गी जिस बड़्डी चुनौती दा सामना करना पवारदा ऐ, ओह आतंकवाद ऐ। एह क्षेत्रीय ते वैश्विक शांति लेई चुनौतीबनी गेदी ऐ। एहदे खलाफ तौले सख्त कारवाई करने दी लोड़ ऐ। मंत्री होरें आखेआ जे उंदा एह मन्नना ऐ जे एससीओ क्षेत्रीय आतंकवाद रोधी ढांचे राएं खित्ते च आतंकवाद खलाफ लड़ाई च तौर तरीके प्रस्तावित करी सकदा ऐ ते एहदे कन्नै बेहतर तरीके कन्नै निबड़ी सकदा ऐ।

<><><><><><>

CS-Fruit

मुख्य सचिव अटल डुल्लू होरें तौले खराब होई जाने आलिएं चीजें दी ढो-ढोहाई गी लगने आले समें गी घट्ट करने लेई इनें गडिडएं दी रमानदारी कन्नै आओजाई बनाने लेई इक व्यापक योजना बनाने पर जोर दित्ता ऐ। उनें फलें दी ढो-ढोहाई करने आले ट्रकें दी पंछान लेई उंदे पर खास स्टीकर लाने ते मंडिएं तोड़ी पुज्जने लेइ ट्रकें गी बिना अड़चन सहूलत देने लेई आखेआ। तां जे फल-फरूटें दी पैदावार करने आलें गी कोइ नुकसान नेई होवै। मुख्य सचिव बक्ख-बक्ख धड़ें कन्नै लग्गी दी मीटिंग दी अध्यक्षता कीती। श्रीनगर जम्मू राष्ट्रीय जरनैली शिड़क पर ट्रकें गी लगने आले समें गी घट्ट करने बारे रणनीति बनाने पर सोच बचार कीता गेआ। मुख्य सचिव होरें एन.एच.-44 पर ट्रैफिक गी घट्ट करने लेई मुगल रोड ते जवाहर टनल गी वैकल्पिक तौर पर बरतने लेइ आखेआं उनें आखेआ जे इस गल्ल गी जकीनी बनाया जा जे जम्मू गी जाने आले खाली ट्रक ते तेल दे टैंकर मुगल रोड राएं जान।

<><><><><><>

Poonch

जम्मू दे डिवीजनल कमीशनर रमेश कुमार ते जम्मू जोन च पुलस दे अतिरिक्त महानिदेशक आनंद जैन होरें कल इक बैठक दरान पुंछ च औंदी सलाना बाबा बुड्डा अमरनाथ जी दी यात्रा दे प्रबंधें दा जायजा लैता। यात्रा अगले म्हीने थमां शुरू होआ करदी ऐ।

पुंछ थमां आकाशवाणी दे संवाददाता दी रिपोर्ट मूजब पुंछ च डीडीसी दे चेयरपर्सन तजीम अख्तर, डिप्टी कमीशनर यासीन एम.चौधरी, डीआईजी राजौरी-पुंछ रंज तेजेन्द्र सिंह, एसएसपी जुगल मन्हास ते केई अधिकारिएं, सिविल समाज दे मिंबरें ते धार्मिक संस्थाएं दे नुमायंदे यात्रा गी रमानदारी ते सुरक्षत ढंगै कन्नै कराने सरबंधी बक्ख-बक्ख पैह्लुएं पर सोच बचार कीता। डिवीजनल कमीशनर होरें यात्रिएं गी सब्बै जरूरी सहूलतें गी जकीनी बनाने बारे डीसी होरें गी निर्देश दित्तुं पुलस दे अतिरिक्त महानिदेशक होरें व्यापक सुरक्षा उपाह् करने दे निर्देश दित्ते ते यात्रा दे रस्ते च लोड़चदी गिनतरी च पुलस बलें गी तैनात करने ते सख्त निगरानी रखने पर जोर पाया।

<><><><><><>

Export India

भारत दा माल समेयान ते सेवाएं दा निर्यात जून म्हीने च 5.4 फीसद बधियै 65.4-7 अरब अमरीकी डॉलर होई गेआ ऐ। बपार ते उद्योग मंत्रालय आस्सेआ जारी आंकड़े मूजब अप्रैल कोला लेइयै जून म्हीने तोड़ी दी त्रऊं म्हीने दी अवधि दरान कुल निर्यात दा बाद्धा 8.6 प्रतिशत बधियै 200.3-3 अरब डॉलर होई गेआ ऐ। कारोबारी निर्यात पिछले बरे दे मकाबले 2.5-5 प्रतिशत बद्ध दर्ज कीता गेआ ऐ जिसी खरा ते सकारात्मक मन्नेआ जा'रदा ऐ। इस ब8रे जून म्हीने च बपारिक निर्यात जिनें क्षेत्रें च बधेआ ऐ उंदे च मुख् तौरा पर इंजीनियरिंग क्षेत्र च बरतोने आला माल समेयान, इलैक्ट्रानिक, दोआइयां, कॉफी ते कार्बनिक ते गैर कार्बनिक रसैन बगैरा शामिल न।

<><><><><><>

RDD Jammu

ग्रामीण विकास ते पंचैती राज मैह्कमे दे सचिव डॉ. शहीद इकबाल चौधरी होरें कल जम्मू खित्ते दे केई जिलें च मैह्कमे दी स्कीमें दा जायजा लैता। केन्द्र शासत प्रदेश दे कैपेक्स बजट, महात्मा गांधी राष्ट्रीय ग्रामीण रोजगार गारंटी कनून, प्रधानमंत्री आवास योजना ग्राममलीण, राष्ट्रीय ग्रामीण आजीविका मिशन, एकीकृत वॉटरशैड प्रबंधन प्रोग्राम, राष्ट्रीय ग्राम स्वराज अभियान ते हिमायत योजना कन्नै सरबंधत बक्ख-बक्ख पैह्लुएं बारे सोच बचार कीता। ग्रामीण विकास मैह्कमे दे सचिव होरें स्कीमें गी समें सिर लागू करने दे महत्व ते पिछली मीटिंग दरान लैते गेदे फैसलें पर कम्म करने पर जोर पाया। उनें राष्ट्रीय ग्रामीण आजीविका मिशन सरबंधी मूलढांचे मुतलत परियोजनाएं गी अमल च आनने पर ध्यान देने बारे अधिकारिएं गी निर्देश दित्ते।

<><><><><><>

Jammu Yatra Batch

श्री अमरनाथ जी की यात्रा पूरी चाली रमानदारी ते बवस्था आले ढंगै सिर जारी ऐ। जम्मू दे भगवती नगर आले आधार शिविर थमां अज्ज बडलै 4 ज्हार 132 यात्रिणं दा 18मां जत्था सख्त सुरक्षा बंदोबस्त हेठ कश्मीर घाटी लेई रवाना होआ जेहदे च 2 ज्हार 872 मर्द, 1 ज्हार 168 महिलां, 18 न्याणे, 68 साधु ते 6 साध्वियां शामिल न जेहडे बडलै त्रै बजे 151 गड्डिणं दे काफले च सुआर होइयै बालटाल ते पहलगाम आले आधार शिविर पर रवाना होए। इंदे च 1 ज्हार 808 श्रद्धालु बालटाल लेई ते 2 ज्हार 324 श्रद्धालु पहलगाम लेई रवाना होए, जित्थुआं ओह अपनी अगगे की यात्रा शुरू करगंन।

<><><><><><>

DPR

खित्ते च राबता गी बढावा देने ते खित्ते च शिडक यातायात गी मजबूत करने दे मकसद कन्नै लखनपुर-बसोहली, बनी, भद्रवाह-डोडा राष्ट्रीय जरनैली शिडक की रणनीतिक महत्ता गी समझदे ते दिकखदे होई इक व्यापक प्रोजेक्ट रिपोर्ट तैआर कीती गई ऐ। इस रिपोर्ट मूजब 100 किलोमीटर दा छिंउा घट्ट होई जाग।

<><><><><><>

Helpline

पुंछ ते राजौरी जिले दे उनें बसनीकें जेहडे विदेशें च खास करियै खाड़ी मुल्खें च रवा करदे न, उंदिणं शकैतें दा नबेड़ा करने लेई। जिला पुलस पुंछ नै इक ओवरसास हैल्पडैस्क की शुरूआत कीती ऐ। जम्मू जोन दे पुलस दे अतिरिक्त महानिदेशक आनंद जैन ते डिवीजनल कमीशनर जम्मू रमेश कुमार होरें पुंछ च ओवरसीस हैल्पडैस्क दे कन्नै इक एंटी ड्रग्स हैल्पलाइन की बी शुरूआत कीती। उनें बुड्डी अमरनाथ यात्रा दे प्रबंधें दा बी जायजा लैता।

<><><><><><>

Udhampur Parking

उधमपुर च सरकारी मैडिकल कालेज च पार्किंग आली समस्या कन्नै निबड़ने लेई प्रशासन नै बहु-मंजिला पार्किंग कायम करने लेई इक प्रोजेक्ट तैआर कीता ऐ। इसदे पर 12 करोड़ रपे दी लागत आंग। इस बारे होर जानकारी आकाशवाणी दे उधमपुर संवाददाता थमां

<><><><><><>

Kharif Crop

भारत च ऐकती सौनी फसलें दी रड़ 575 लक्ख हैक्टेयर कोला मती कीती गई ऐ। राई-बाई ते करसान कल्याण मंत्रालय दे आंकड़े च आखेआ गेआ ऐ जे पिछले ब'रे इससै अवधि दरान लगभग 50 लक्ख हेक्टर दे मकाबले 62 लक्ख हेक्टर कोला मते रकबे पर दालें दी रड़ कीती गई ऐ जिसलै जे तेल आलियां फसलां 140 लक्ख हेक्टर कोला मते क्षेत्र च राहइयां गेइयां न, जिंदी पिछले ब'रे इस अरसे दरान 115 लक्ख हेक्टर क्षेत्र च रड़ कीती गई ही। मंत्रालय दा आखना ऐ जे धान-मुंजी दी लैब लाने दा क्षेत्रफल जेहड़ा पिछले ब'रे इस अरसे दरान 95 लक्ख कोला दना उप्पर हा, ओ ऐकती बधियै 115 लक्ख हेक्टर होई गेदा ऐ।

<><><><><><>

Junior Common Wealth

जम्मू कश्मीर च खेलो इंडिया स्टेट सेंटर ऑफ एक्सीलेंस दी होनहार एथलीट छवि शर्मा नै कैडेट ते जूनियर कॉमनवेल्थ तलवारबाजी प्रतियोगिता दे सेनर कुड़िएं दे मकाबलें च कैह दा तगमा जित्तेआ ऐ। न्यूजीलैंड दे क्राइस्ट चर्च च होआ करदी 2024 आली कॉमनवेल्थ जूनियर ते कैडेट फेसिंग चैपियनशिप च छवि शर्मा नै एह उपलब्धी हासल करियै देश गी फक्र मसूस कराने दा मौका दित्ता ऐ। तमिलनाडू दी जफरलीन, कर्नाटक दी एस.तन्वी ते दिल्ली दी तनिश्या सिंह ते एस तन्वी बी इनें मकाबलें च मुख्खें दी नुमायंदगी करा करदियां न।

<><><><><><>